



CAROLVS Nepos Botuildi Regis Sueonum extitit. Is post parentum funera magno hominum applausu Rex constitutus fuit. Eius gesta adeò præclara & magnifica fuerunt, vt meritò cū optimis Regibus conferri possit. Tanta moderatione enim regnū gubernauit, vt non modò Rex verum & pater patriæ diceretur. Proceres enim loco fratrū, alios suos filios reputabat. Itaq; alios ad honores euehebat, alijs tributa laxabat, & legum per ignorantiam transgressores clementer increpabat. Si qui verò per malitiam peccarant, eos adeò seueriter castigabat, vt alijs exemplo essent. Hinc factum vt Principis optimi mores po-

populus imitaretur. Hic Carolus inter alias leges sanciuit, vt Gothi ac Sueci inter se & omnes peregrinos hospitalitatem obseruarent, & pro magno scelere duceretur, viatorem à tecto arcere. Quòd si quis id facere tentasset, & idoneis testibus ter negasse hospitium conuictus esset, immisso igne eius ædes comburi iussit. Vnde etiam factum, vt hospitalitatis iura semper apud Sueones & Gothos inuiolata manserint. Hoc modo summa pace ad foelicem senectutem Carolus peruenit, atq; à nullo alio quam Tordono Noruegiano bello lacepsitus fuit. Verum is in aciem progressus manibus Caroli percussus occubuit. Cum hac ratione diu præfuisset, tandem obiit, & magnum sui desiderium reliquit. Claruit is circa annum mundi ter millesimum quingentesimum sexagesimum. Ioan. Mag. Hist. Goth. & Sueonum lib. 4. cap. .